

湯潛菴集 下




漢書門		九	四	三	九
一	四	一	〇	五	九
冊	架	函	號	類	

內閣文庫		漢	書
三	九	九	四
〇	四	三	九
函	一	四	二
九	冊	架	類

理學全書

內閣文庫	
番號	漢 9439
冊數	142 (142)
函號	299 47



湯潛菴先生集卷之下

尤溪劉鴻略涓三



羅源陳紹濂尚友

晉江史大範子疇

平和汪奇猷嘉仲

儀封張伯行孝先甫訂 受業

全校



傳

明兩浙運使倣轅張公傳



張公諱正學字宗儒號倣轅睢州人世居潮莊之南三里
父諱權號樂菴累贈中憲大夫廬州府知府母王氏累贈
恭人公丰儀秀偉孝友天成十歲授尚書為文落落有大

家風弱冠入府庠食餼名聲藉甚萬曆癸卯舉於鄉公車歸櫬戶著書泊如也癸丑成進士以素恬淡嗜讀書請改教職甲寅補順天府學教授董率維勤乙卯門下士獲雋者十餘人是年陞國子監助教丁巳陞刑部主事歷員外郎中秉公執法多所平反時南臯鄒公爲侍郎嘆服之嘗云張君精神收斂退藏真是歸根之學由是名益著辛酉陞廬州府知府下車卽修學宮鋤衙蠹廬郡承平日久城池頽壞捐俸築濬尤杜絕饋遺有庫吏暮夜以金盃等物持獻欲有所關說面叱之加以重法於是羣吏人人股慄凡斷事平心細訊必得其情時巡按某受重囚賅欲盡釋

之公持不可又票取無礙官銀千金亦不應巡按大怒思借事中傷搜索無隙乃止稍遷兩浙都轉運鹽使司運使慨然曰古人急流勇退吾可已矣遂致政歸里居竿牘不入公庭課子孫讀書教以孝弟謹厚每遇豪橫不法事輒爲之憤懣至終夜不寐嘗曰凡做事只要自己心上打得過便爲之打得不過卽毋爲睚之婦人孺子無不稱之爲善張云是時袁大司馬可立楊大叅堯華余光祿化龍皆以耆碩里居相與聯席結社茗酒娛樂修耆英香山故事鄉里榮之至有傳爲圖繪者年七十有七卒崇祀鄉賢配李氏累贈恭人早卒繼配孟氏累封恭人男一辰垣生日

孫二銘鼎廩生銘旂庚戌進士杞縣劉文烈公誌其墓
論曰吾郡自萬曆以後士大夫習爲驕奢凌虐鄉里至今
道路以目而公獨以善張著今考其行事蓋真秉道絕欺
確乎不可拔者矣其子孫皆恂恂善下人雖通顯猶杜門
誦說詩書無輓近儂薄之習謂非公之留澤遠乎余故爲
紀之使後進有所觀法焉

處士孫君傳

孫君諱博雅字君僑容城人徵君鍾元先生之第四子也
幼端重不苟嬉笑司學生見之輒爲斂容甲申年十五應
童子試提學御史陳公純德賞其文將放榜值流寇陷京

師陳公殉國難君遂屏舉子業絕意仕進從徵君避亂於
雙峯一時同避亂者皆弄弓矢刀劍譚兵事君獨日攜書
卷坐古栢下與人語惟經史及古今忠孝節義事娓娓不
倦曰他非我所知也徵君將遷居蘇門道出祁州刁君蒙
吉留講學於家者三月旣去而君與母楊孺人獨留貧無
以炊賒柿餅以供母徒步奉至蘓門徵君撫之喜作書勞
之母病君不解襟帶不交睫者三旬餘及卒爲孺子泣三
年不見齒徵君年漸高偕兄弟朝夕上食祝哽祝噎夜則
更臥牀前候其欠伸未嘗少離有所制作則侍筆劄時四
方遊徵君之門者履交於戶有數百里或數千里至者君

爲之設榻供食各得其宜徵君晚年重聽諸弟子問難必藉君轉達雖反覆開示不厭更端間有未暢其旨者君輒援据經傳發言外之意聞者往往灑然解悟故遠近來學之士與君日親君僑之名遂滿天下徵君著書不下數百卷編摩訂正君之力爲多嘗數易稿皆手書字體古健無一筆苟簡蓋其孝謹好學類如此己酉詔舉山林隱逸郡守程公啓朱曰河北諸郡邑吾所知者獨孫子耳以其名上之方伯撫軍君自陳一介腐儒學不通時父年八十安能違親就徵諸公深歎重之遂不相屈亡何徵君卒哀毀骨立喪葬以禮觀者莫不感動君至性過人漸濡家學德

氣日益純粹與人交和易可親見人有善贊揚不置口人有過不顯言默然端坐間引一二古語相感發聽者爲之聳然多見省改問以時事似不別黑白至談古今成敗得失瞭若指掌也丙辰弟韻雅坐事被逮繫司寇獄君具橐饘以從庚申夏將遠徙兼染時疫君往來省視僕僕於烈日黃埃中守衛悍卒咆哮怒詈君怡然受之宛轉爲弟致藥餌飲食更周卹其同繫者幸朝夕相顧視君故貧又竭產供給弟者已四年故交欲有所贈遺逡巡不肯受旁觀者察其形容憔悴勸之自愛勿徒累死君曰吾弟行免矣吾何病時方館於崔學士玉階家每獨宿假寐口中囁嚅

細聽之皆其弟事也頃之竟病不起彌留猶張目曰吾弟
免矣遂卒當其弟之被逮也君追送之奔馳炎暑策蹇驢
隨一蒼頭遇暴風雨失道幾溺死後歸家聞有赦隆冬赴
京徹夜行冰糊其口呼不成聲僵仆於路幾死又嘗讓蹇
驢於同難之械繫者徒步以從解役疾驅百餘里兩足皆
腫不得休幾困頓饑渴死當是時君惟痛念先人之積德
不宜獲此報也先人之家聲不宜自此墮也弟之情然驟
遇此難冀倖獲爲天所矜也而不知已之憂勞可以死
也死後不數日而弟事漸寬竟免遠徙於是聞者無論識
與不識皆泣下沾襟曰孫君之死也蓋死弟難也其友也

本於孝也精誠足以感通神明也年五十有五所著詩文
曰約齋集若干卷子漢有文名史氏湯斌曰昔孔氏褒融
兄弟爭死載之史冊兩稱其義若君僑之於其弟也風雨
慘澹肝腸寸折至於不自知有其身憂愁况瘁竟以客死
嗚呼難矣其詩曰苦海無舟焉問岸福堂有弟遂成家讀
之誰不酸鼻流涕者而况平生交遊如余也夫君僑德性
學術天假之年必能昌大徵君之傳而竟以此終抑又悲
夫

封庶吉士李公傳

李公諱兆慶字頰甫閩之安溪人初號漁叔追思父念次

公之德也更自號惟念故世稱惟念先生云公兄弟四人並力學著聲而公尤魁梧多奇節爲文不假繩尺與淹宏博屢試輒高第明季閩海弗靖甲族富室畏縮伏草間往往不能自保公獨聚宗黨擇山中高阜鳩工築室百堵守禦且備巨寇突至連日夜攻之卒不得志而去公復設立教條鄉里兢兢奉約束遠近賴以保全者甚衆鄉人有淪於賊者傾貲贖之初不問其識與不識也歲乙未家陷於賊仲兄雅稱武健持矛薄賊壘門竟全其家屬而歸人服其才且勇調亦公素德足以感之云亂定歸舊居櫪戶却掃藏書數簏幸無恙詮次黜定課子弟誦讀聲琅然達丙

夜今學士其長公也辛丑貢於鄉甲辰自京師還里修宗祠定春秋祭期遠祖墳墓久湮沒荆榛間殆不可考公按譜牒徵鄰翁搜而得之者凡四焉更修緝家乘訪求先世贈答遺文凡所以爲祖考計久遠者靡不殫力從事蓋其誠孝如此庚戌學士成進士讀中秘書遇 覃恩封公如其官癸丑請假歸未幾滇黔告變八閩相繼逆命阻絕聲教者三年學士抗節不屈 王師南下間關遣使具蠟丸密陳道里險易進取機宜狀卒成恢復之功者學士稟公之教多也 上以學士忠貞懋著特晉秩 命入都陛見公促使叱馭而學士念公年老遲迴久之不得已後行至

福州而公卒公生平厭絕粉華嚮慕往哲時有心得與理
學語錄默相契合故能踐履篤實大節不苟如此年六十
有七子四人學士名光地次鼎徵光埴光坡

贊曰余與學士同官京師以德業相砥礪其學浩博淵通
而持守堅定一遵程朱不爲世儒游移之說與余有乳水
之合後乃得聞封公之懿行蓋家學淵源有自矣當學士
之奉命赴都也宜星言夙駕而公度其意次且不果知
其以已老病故外示矍鑠而私語其室曰度子行瀕至我
乃可死耳蓋生平重大義家庭相勗一然諾不敢宿况君
父之際乎使學士顧戀親恩愆期不進雖奉舍殮非公意

也公卒後又值海寇突犯依阻憑險盡有漳泉之地撤晉
江橋梁自以爲天塹不可飛度學士奮然墨線誓旅鑿山
開道仰請王師椎牛醜酒士馬飽騰造舟爲梁一日夜
搗其巢穴賊以爲自天而降潰敗不可復支盡復兩郡還
之朝廷以文學侍從之臣功在封疆人乃知儒者之功
用果非虛談無實效也至尊嘉嘆壯猷行將倣王文成
故事河山帶礪以報殊庸此固所以成封公之志余亦拭
目聿觀厥成焉故因傳封公而併及之

王氏五節烈傳

山東新城王氏有烈婦三日孫氏于氏張氏節婦二日張

湯潛菴集 卷之十
氏高氏孫氏者浙江布政使象晉之冢婦生員與齡之元
配也事舅姑以孝聞崇禎丁丑與齡省布政公於武林病
卒孫氏欲以死殉既而顧念藐孤謝簪珥篝燈課讀俾克
成立壬午十二月朔大兵破新城家人勸避匿孫氏曰婦
人非傅姆不下堂我未亡人也有死而已遂投井死越三
年甲申李自成陷京師則有于儒人隨侍御公與胤夫婦
殉節之事時侍御方以建言左遷家居聞變以死自誓或
言公無封疆社稷之任幅巾野服可畢此生無爲徒死也
于儒人獨不言旣而曰妾從君稱命婦矣君爲忠臣妾獨
不能爲烈婦耶遂登樓相對自經死于士和泣曰父死忠

母死節兒何心獨生亦自經於其旁而士和妻張氏先於
壬午城陷自經死壬午城陷時王氏父子兄弟殉難者曰
貢生與朋與其長子舉人士熊次子生員士雅士熊妻張
氏年二十一士雅妻高氏年十九兩人同矢志守貞事孀
姑盡孝兩家皆名族高氏尤貴盛布衣糲食有人所不堪
者紡績自給媼黨罕見其面惟元旦一出拜家祠而已守
節十八年張氏卒又二十年高氏卒皆無子

湯斌曰新城王氏簪笏盈庭以文章勲伐著聲當代者踵
相接矣侍御公尤以忠烈著一門之內子孝臣忠可謂極
盛而閭閻尤焯焯如此豈正氣偉節有以相感耶抑家訓

湯潛菴集 卷之十
之浸漬有素也孫孺人爲婦爲妻爲母皆有法則而侍御
公歷官清白常巡茶馬離政稱職仕矣家無長物孺人
儆戒之力居多世固未有平日不能盡道而能自靖於患
難之際者也張孺人以少年慷慨殉難兩節婦貞操久而
彌堅尤人所難者士君子立名砥節常壞於因循卽或勉
強於初年而不能不渝節於末路吾故合傳五節烈爲世
示法焉

告諭

嚴禁徵收錢糧勒索火耗私派之弊以恤民艱以清

賦稅告諭

江南財賦甲於天下小民輸將正供拮据維艱兼以近年
水旱頻仍困苦尤甚 皇上軫念黎宵肝不遑額徵正
賦之外不得橫徵私派多科勒索定有處分嚴例州縣有
司務宜潔已奉法杜絕私派痛除耗羨俾民間省一分浮
費卽可完一分正供司道府爲屬員表率尤宜端本澄清
剗剔蠹弊禁止苞苴則州縣免分外之需小民卽可受寬
大之惠額賦易於完辦各官亦免考成之累庶不負 朝
廷簡任牧民之意乃有等不肖官吏惟圖營私飽橐罔顧
功令民瘼或於派徵之時浮額多科或於收納之際加勒
火耗如地畝錢糧江南各屬額賦已重每徵正銀一兩部

法之外多勒耗羨八九分至一錢不等而江北州縣竟有
加至一錢五六以至一錢七八分者至於雜辦錢糧如行
夫牙戶匠班漁課碾餉等項竟不開明每丁應徵數目止
開某戶應徵幾丁字樣通同奸胥蠹役恣意橫徵每丁止
應徵正銀一兩四五錢者竟徵二三兩仍復加四五勒耗
再如酒稅一項原因用兵需餉暫行徵收爲民牧者自應
體恤民隱照額收解乃視同凡肉亦復加四徵收更有並
非額編橫行派累如田房稅額既經案照業戶賣契計數
徵收稅銀復於田畝上按畝按甲加數派徵及借稱某項
公費并捐助名色輒加派里遞指一徵十官蠹分肥此皆

州縣刻削下民脂膏之弊也司道衙門凡遇州縣交錢糧
則有坐平耗羨名色彈兌陋規庫官胥吏堂役以及把門
轎傘之夫俱有收銀使費種種錮習難以悉數此則司道
府婪索州縣之弊也此等弊實在從前督撫歷經嚴禁稍
爲斂戢者固有而陽奉陰違者實多本院未出都門久已
稔悉及入境以來見聞更有真切嗟小民有限脂膏上下
官蠹如此層層剝削無怪乎民生日蹙朝廷正賦歲歲
逋懸動盈千萬若不嚴行懲創何以救民水火無虧國儲
除現在密訪叅挈外合行出示禁飭嗣後各宜洗滌肺腸
改絃易轍凡州縣徵收正雜錢糧務按由單科則應徵確

湯潛菴集 卷之五
數如法驗派明白開寫單票令民通曉毋容額外私加毫
忽仍聽納戶照依部頒法馬按數稱兌自封投櫃櫃役止
許登填流水截給串票不許執戥秤收司道衙門如遇州
縣解交錢糧一依部法平準兌收明白即便印掣批文送
院銷算永杜積弊如有不肖官蠹枯惡不俊仍踵前項諸
弊許諸色人等不時赴縣具稟一經察確官則飛疏叅拏
役則立刻杖斃倘有奸頑里甲劣衿衙蠹輸納糧銀故爲
短少亦必查驗真實申報究懲不得窺視殷實之家借名
納銀輕少籤提拏飽其谿壑如有此等定行飛提重治
本院執法如山言出必行斷不寬假各宜猛省無貽噬臍

慎之慎之

嚴禁婦女入寺燃身以正風化告諭

婦職但司中饋閨幼專習女紅皆宜靜處閨幃別嫌明微
卽異姓親戚不得相見乃聞開元等寺何物妖僧創爲報
母之說煽惑民間婦女百十成羣裸體燃燭扇臂謂之點
肉身燈夜以繼日男女混雜傷風敗俗聞者掩耳而乃習
久不察視爲故常良可哀憫卽曰親恩當報生養死葬自
有定禮違禮辱身是謂不孝何名報恩合行出示爲此示
仰該管官吏及軍民住持人等知悉嗣後婦女各宜靜處
閨幃不得仍蹈從前惡習入寺裸體點肉身燈如有犯者

許地方附近居民稟官嚴拿究處女坐其父婦坐其夫僧
道容隱不行舉發者解院重責三十板枷示寺門三箇月
不貸

嚴禁請託以肅官箴告諭

江蘇地號繁盛遊客所聚風俗刁詐人心險惡官斯土者
往往以情面請託敗其官聲得罪公論禍不旋踵本院廿
載林泉六年吏局茹藥飲冰甘之若性奉命撫吳誓之
關帝神前斷絕交遊不畏強禦受賄徇情神明殛之將及
一載地方官民頗能相信惟是積習日久不肖小吏猶多
藐玩不知本院執法到底輒欲自行嘗試有一缺出爭謀

署篆皆素行貪惡敗檢無恥之徒不知世有天理王法雖
本院大聲疾呼猶然贖贖者此等奸徒可以百里相寄乎
夫百里之地錢糧刑名皆國計民生所關卽部選非人本
院尚當自簡嚴糾稍有徇縱便屬溺職若委署非人罪何
可道然委署重任矣而署官不能盡職是署官負本院也
若先徇情濫授是本院以朝廷百里民命賣與匪人也
卽其人不至大敗而本院之心尚可對上天告皇上乎
除凡不自安分妄行營謀者另行糾處外合行曉諭爲此
示仰大小屬吏知悉各宜體諒本院誓神之意恪守官箴
無懷徼幸如本院不能慎終如始一有徇假不妨公揭通

法澤者集 卷之十一 三
循以彰本院負國之罪如本院清苦勞悴自甘毫無私弊亦求相諒以全晚節幸甚幸甚

嚴禁阻葬惡習以弘孝治告諭

民間買地安葬原屬各從其便乃吳下惡俗每有棍徒構同勢豪凡遇民間造墳輒借稱妨礙風水煽惑阻撓肆行嚇詐稍不遂欲糾集打降拳勇百十成羣或毀撤磚石灰料或晝夜掘壞地脈甚至掀翻棺木打傷人命肆橫無忌遂至訐訟紛爭拖累破家安葬無期終成暴露言之真堪髮指本院稔悉此等惡習已經嚴禁不謂蘇松屬縣其風猶熾此皆地方有司奉行不力故耳合亟嚴行示禁爲此

示仰撫屬官吏軍民人等知悉嗣後民間造墳安葬聽從其便如有不法棍徒怙惡不悛仍敢糾衆阻葬許受害之人指名具告地方官嚴拏解院以憑盡法重處如有司奉行不力或經本院別有訪聞定以徇職指叅決不姑寬

嚴禁賭博以絕盜源告諭

士農工商各有本業賭博爲非律有明禁吳下有等無賴棍徒開賭場引誘良家子弟羣集賭博徹夜呼盧良賤不分兵民混雜一入彀中莫能悔悟腰纏罄盡流入匪類穿窬掏摸無所不爲開賭棍徒但知拈頭取利孰論奸良以致賭博之場竟成盜藪貽禍地方深可痛恨至於紳衿讀

書明理尤當砥礪廉隅戒絕怠荒名教自有樂地何乃亦
以鬪馬吊爲事總緣習俗以成莫能自振甚至與士卒細
民爲伍禮讓全無惟憑機械惡習以經嚴禁印造馬吊紙
牌令其改業孰意愍不畏法之徒仍不悔悟除現在查訪
掣究外合行嚴禁爲此示仰諸邑人等知悉士農工商各
務本業不得相聚賭博陷入不義甘蹈法網如有不法棍
徒開場糾賭以及私造紙牌暗行發賣許地隣保甲人等
協力擒拿赴稟本縣印官轉解本院究詢明白按律從重
治罪如地隣保甲徇情容隱事發一體究處各宜猛省無
自執迷

明正學勤課藝告諭

聖學明則風俗淳蒙養正則士習端訓練勤則藝業精吳
中人士文章藻麗爲天下冠而敦本正始明倫敬身之道
猶有未盡講明者夫本始之教莫重於孝經而養蒙育德
莫切於小學合行定期開講爲此仰該學教官即便聘耆
儒每月十一日在明倫堂講孝經小學之日長吳二縣各
社學教讀俱率生徒聽講月課之日教讀一體聽候課試
其供給各衙門分日輪備毋得違錯

禁賽會演戲告諭

吳下風俗每事浮誇粉飾動多無益之費外觀富庶內鮮

蓋藏偶遇災稜救死不贍本院不勝痛惜如遇迎神賽會
搭擡演戲一節耗費尤甚釀禍更深此皆地方無賴棍徒
借祈年報賽爲名圖飽貪腹每至春時出頭斂財排門科
派於田間空曠之地高搭戲臺開動遠近男婦羣聚往觀
舉國若狂廢時失業田疇菜麥蹂躪無遺甚至拳勇惡少
尋釁鬪狠攘竊荒淫迷失子女每每禍端難以悉數本院
竊爲爾民計以此無益之費而周恤鄉黨親族刊布嘉言
懿行則人頌好善積累陰功何苦以終歲勤劬所獲輕擲
於一日曾有何益本院已屢次諄諄告誡城市之間稍稍
斂跡而鄉村僻處曾未之改深爲民病合行出示嚴禁

墓誌銘

前兵部尚書湛虛張公墓誌銘

皇清順治十有三年四月初三日明兵部尚書磁州張
公卒於家是年八月葬於槐樹村之阡少保劉公誌其墓
矣至康熙十八年其子貢士冲等改葬於南城村先塋之
次遵治命也公之孫翰林編修榕端持其父故庶常君潛
所作狀及冲敘改葬事始末來請銘余與庶常君同舉進
士嘗以年家子謁公里第接其狀貌偉然巨公長者也庶
常君刻公遺集四十卷成遣使渡河授余校正且屬爲序
余未學舛陋逡巡不敢操筆者十年矣反覆熟讀自謂知

公生平大畧乃不敢辭公諱敬心字孝仲號湛虛晚號晦
臣先世襄垣人後遷磁考諱仁聲封通議大夫兵部右侍
郎妣許氏封淑人公天啓二年進士知蕭縣調定遠再調
泰興以治行高等擢禮科給事中掌大計進太常寺少卿
遷大理調南光祿寺卿擢兵部右侍郎兼都察院右副都
御史總督兩廣軍務召入爲兵部左侍郎以薊遼總督張
福臻未至命公代之加兵部尚書俄福臻至議公別用旋
丁母艱弘光立詹事漳浦黃公薦公老臣宜大用時馬士
英阮大鍼用事黃公不能安其位公因避去 國朝定鼎
大臣推薦章數上以丁父憂固謝守制遂終不起公負經

世大畧其令泰興也歲饑代民完漕糧四千石全活數千
家爲給事當莊烈愍皇帝時內外交訌軍國積弊臣下錮
習不可究詰而天子求治過急政尚操切僉人窺伺意旨
附會以作威福而正人旅進旅退不能盡其謀國之忠公
首陳七要繼陳十二事大約請上靜正自治推誠馭下尤
當愛惜人才勿以一眚輒棄更欲臣下破除偏黨公忠廉
直佐成蕩平之治慎刑罰抑躁競嚴保舉以課成效行蠲
恤以收人心練兵核餉委任樞輔侃侃萬言皆切中時宜
當國者撫卷歎息至擬之魏徵十漸也畿甸失事上震怒
不測公語政府曰主上嚴則宜佐之以寬臣下玩則宜防

之以禮邊境不戒過在將領文法交詆大獄繁興至使八座一空衣冠囚首猶得謂國有人乎政府雖不能用時論躡之會大風兩電上書言春秋僖公二十九年兩電傳言爲公子遂昭公四年兩電傳言爲季氏今日必有大臣擅權以干天怒者嚴旨詰責而公遂劾總制劉策巡撫王從義大帥侯世祿逗遛縱兵狀更論吏部尚書王永光推薦高捷史莖爲荷公夤緣指斥尤切未嘗以利害禍福自絀也掌大計時閣臣溫體仁有所屬意公陽爲不喻曰吾不能代執事報私怨以此忤閣臣意賴公素持正爲上所信不能間也禮部議舉謚典訪冊至七百人公上言謚法寧

嚴勿濫因列陶安方孝孺鐵鉉

等數人上嘉納又請

出御史吳阿衡於獄舉范

知兵未幾范公以閣臣殉

國而吳公亦以薊遼死事世益稱公爲知人其總督兩廣也濱海數郡爲島裔窺伺蛋戶豪姓與之交通公旣嚴奸宄之禁設柘林黑石虎門之防發材官受賕之罪誅連州妖賊及思明部民之戕土官者規畫畧定無何禁寇圍韶兩粵騷然公遣將却之寇據榔桂之間高獠紫獠二源其窟穴也自嘉靖以來梗化且百年公以爲非大創不可奏請合沅贛兩撫會勦上以賊實在楚客兵功當倍論公聞命誓師購搖遠偵探巖壁壘蒐討軍實久之沅贛兵始

集公命粵兵批堅深入斬馘千計下令乘勝直搗二源諸將難之公曰諸君不見漁獵者乎池魚穿獸一舉可盡也楚寇卽粵寇何疆域之足云分兵一自連州入一自藍山入扼其咽喉主簿峒最深險峻叱令捲甲疾趨一戰而得之憑高俯擊高獠遂破復依山縱火分翼夾攻紫源亦定是役也破洞源三十有六俘斬三千釋其脅從流亡來歸雖號爲三省犄角而先登奪隘粵功實最時武陵筦樞曲庇楚撫公僅賜級資金幣而已科道交章言功高賞薄使客兵倍論之旨不信公曰吾知平寇耳他何敢問安南黎莫構兵公上言帝王詳內畧外當慎守關隘兩存而弱之

廣西巡撫林贊請存莫圖黎已有旨報可公謂制外之道宜彰大信黎入貢而絕之非所以懷遠人也因輯馭交紀二十二卷以進天子以爲然勅公便宜從事卒如公言而定至於平盤古十八峒之寇與崖州英乳建署設防立學置師使黎人子弟皆通孝經從來所未有也公爲政博大而精詳在粵五年恩威並用智勇兼施凡所以爲地方經久計者無不盡其力後之人守其成畫不敢變也而張弛緩急之宜卒莫及焉公平生篤於友誼漳浦黃公建言予杖下詔獄知交不敢通問公獨以三百金遺其子供獄中晨夕黃公寄詩謝有云患難勞相恤妻孥感至誠誰期今

湯潛齋集 卷之十一
世界更作古人情甲申以後殉國諸臣多生平故交感舊
懷忠作前後九哀詩弔之辭旨激烈論者謂與謝翺楚歌
相上下也晚年閉戶註易究極性命之旨與孫鍾元先生
往復商確逍遙泉石自稱雲隱居士元老名臣遭遇鼎革
完節令終皜然不滓可謂難也已公生萬曆十八年正月
十九日距卒享年六十有七元配秦氏累贈淑人機杼佐
讀恭儉有禮公未第時卒年三十有一繼配李氏累封淑
人隨任兩廣不市一珠公之清德相成爲多先公一年卒
年五十有五子六沅官生溯歲貢生秦淑人出潛壬辰進
士內翰林弘文院庶吉士贈文林郎翰林院編修衍廩生

沖副榜貢生李淑人出潛貢監生側室汪氏出女一適貢
監生 李淑人出孫男十三槐韓廩生沅子楓益榆漢
溯子榕端丙辰進士翰林院編修柳璟橋恒俱庠生潛子
楠蘧衍子樽崑樾康沖子袖雲澗子餘尚幼曾孫丙謙庠
生四世孫一賜講

銘曰行山鬱時漳水廻瀾篤生偉人國之屏翰侃侃遺直
梧掖垂紳風標嶽立威鳳祥麟臨軒授鉞百粵蠻方甲兵
胸貯嶺霧開張薄伐楚寇鉦鼓鼙鼙緩帶輕裘克奏膚功
日南波靜蟹戶春耕何不中原滅彼櫓槍蹇蹇勞臣鬢髮
如雪入佐中樞朱弓玉節晚年雲臥夢寐羲皇象賢接武

奎壁煨煨歸哉高原松楸蒼蒼銘石不泐奕葉其昌

徵君孫鍾元先生墓誌銘

康熙十有四年乙卯四月二十一日前萬曆庚子舉人徵君孫先生卒於輝縣夏峯之居第一時監司郡縣之大夫與方數百里鄉大夫士哭弔屬路不絕城內外市者罷耕者廢耒里老嗟歎子弟輟誦絃聲督學使檄郡邑列祀百泉書院其冬十月十六日塋夏峯之東原距生萬曆甲申十二月十四日享年九十有二矣道學之傳自濂洛關閩諸大儒後莫盛於明之河東姚江先生幼當梁溪吉水講學都門之日與鹿忠節公一室默對以聖賢相期許忠節

旣沒獨肩斯道者四十載年愈高德愈劭真積日久篤實輝光四方學者不謀而合曰夏峯今之河東姚江也兩朝徵聘十一次纁帛賁於巖谷守令敦趨就道者數矣先生堅臥不起故天下稱爲徵君焉先生諱奇逢字啓泰號鍾元保定之容城人高祖端曾祖廷寶皆有隱德祖臣嘉靖辛酉鄉薦任河東鹽運司運判以清慎稱父丕振庠員授儒官孝友著聞母陳孺人兄弟四人兩兄奇儒奇遇皆庠員弟奇彥以貢士任武城知縣先生少時慷慨有大志十四歲謁楊尚寶補庭補庭問設在圍城中內無糧芻外無救援當如之何先生應聲對曰效死勿去補庭曰此足卜

子生平矣補庭者忠愍公子也十七舉於鄉私第不蓄一
錢兩居父母憂治喪一準古禮偕兄弟結廬墓側飲食必
祭風雨霜雪哀音動人嘗語人曰少年妄意功名自雙親
見背哀慟窮苦中証取本來面目覺向來氣質之偏蓋學
問實得力於此云居京師見曹貞予公舉仁體以告恍然
此心與天地萬物相通時桐城左忠毅嘉善魏忠節長洲
周忠介以氣節相高見先生皆傾蓋定交高陽孫文正公
督師關門鹿忠節爲監軍約先生同遊塞上徧覽山海形
勝指畫如掌孫公留共勦軍事急辭歸語茅元儀曰將相
不合未有能立功於外者公信不愧吉甫如時不可何天

啓末年逆闖竊柄左魏周三君子相繼起繫過白溝緹騎
森布先生與門人張果中拮据調護供其橐餗且告之曰
雷霆雨露總是君恩諸公主張宜蚤定其子弟僕從厥衛
嚴緝莫敢舍者先生與鹿太公爲之寄頌左嘗督學三輔
又屯田有惠政時坐熊經畧贓考掠備至先生與鹿太公
謀設匭建表於門曰願輸金枚左督學者聽於是鄉人投
匭者雲集左旣考死則又按籍俵散去京師不二百里舉
旛擊鼓不畏闖知闖亦竟不知也當事急時遣弟奇彥同
鹿公子馳關門上書高陽公求援公卽具疏以邊事請陞
見面奏機宜都門喧傳公興晉陽之甲闖夜繞御牀而泣

公抵通州亟降旨勒回公回而諸君子不可救矣蓋正人
爲國家元氣非但急友難也事之不成則天也而世徒以
節俠視之過矣客氏弟光先以時焯牢籠士大夫介所知
送名馬以家貧不能具芻秣辭致芻秣之需以病軀不能
乘辭待小人不惡而嚴類如此崇禎戊辰督學御史李公
蕃舉孝行奉旨建坊旌表給三丁侍養丙子容城被圍土
垣將圯窮七晝夜爲攻具先生指示方畧士民協力捍禦
城賴以全事定巡撫都御史恤刑部郎交章聞於朝特詔
褒嘉兵部尚書范公景文聘贊畫軍務固辭不就時寇氛
漸逼都城攜家人五峯山結茅雙峯親識從者數百家修

武備嚴教條所以整齊約束之法甚具更日與其徒講學
習禮賦詩倡和絃歌之聲相聞當兵戈搶攘時雍容禮樂
盜賊睥睨不敢犯嗚呼先生之不用於時豈先生無意於
世蓋亦知天意之不可回也 國朝順治初祭酒特舉長
成均以許文正相擬中外大臣推轂日至先生絕意仕進
移家共城闢兼山堂讀易其中率子孫耕稼自給簞瓢屢
空怡然自適遠邇負笈求學者甚衆有大僚歸老於家北
面稱弟子者有千里遣其子從遊者公卿持使節過衛源
不入公署屏騶從以一見先生爲快先生涵養益邃自強
不息每晨起謁先祠畢退居一室澄心端坐卽疾病未嘗

有情容接人無貴賤少長各得其道與後學答問隨人淺深疊疊窮晝夜不倦子孫甥侄數十人揖讓進退皆有成法閨門內外肅肅穆穆寂若無聲而諸事具有條理姍族故舊恩意篤厚爲之經理婚嫁喪葬惟力是視聞節孝事必爲之表揚先賢祠祀廢墜者必倡衆爲之修理見人家庭乖違與父言慈與子言孝緩譬曲喻必歸於道而後已故賢者悅其誠不賢者服其化卽兒童牧豎亦知歡喜尊敬至於事變之來衆人震撼不知所抵者處之裕如未嘗幾微動於中也其學以慎獨爲宗以體認天理爲要以日用倫常爲實際嘗言七十歲工夫較八十而密此念無時

敢懈此心庶幾少明又曰生平所見有時而遷而獨知之地不敢自欺識得天理二字是千聖真脉非語言文字可以承當故言心卽在事上見言已卽在人上見言高遠在卑邇上見言上達在下學上見戰兢惕勵不敢將就冒認惟是慎獨而已所著有理學宗傳四書近指讀易大指書經近指聖學錄兩大案錄甲申大難錄歲寒居文集答問日譜畿輔人物考中州人物考孝友堂家乘四禮酌乙丙紀事孫文正公年譜共若干卷嘗嘆世之學者不務心得株守藩籬物我未化先生真見道之大原無建安無青田惟以庸德庸言直證天命原初之體可謂千聖同堂造化

與遊者矣程子曰世無真儒天下貿貿焉莫知所之人欲肆而天理滅自先生講道山中公卿大臣四方學士聞風而起皆知聖賢之可爲異端邪說不足以亂孔聖之真其有功於斯世斯人大矣若其自得之深精微之蘊非學問有得於心者烏能測其所以然乎斌何敢謂知足以知之然奉教有年竊觀其語默動靜元氣渾淪全體大用光明洞徹其斯爲凝道之君子何疑歟哲人云萎斯世何宗故不禁涕泗無從也元配槐孺人繼配楊孺人皆有闡德丙辰先生下第槐孺人慰之曰下第何妨卽終身不第吾未見布衣可輕富貴可喜此豈婦人女子所及當先生釀金

救左魏時楊孺人出嫁時衣奩佐之撫前子同巳山事槐孺人母如巳母奉養終身皆人所難者子六立雅忌貢奏雅生員望雅增廣生槐孺人出博雅韻雅尚雅增廣生楊孺人出女二孫十二瀾增廣生潛生員溥生員溶生員淦舉人淳生員漢浩沐浴湛源孫女八曾孫十三用柔用霖用梓用柁用桓用模用楷用樞用植用榦用樟用柱用棟曾孫女五四世孫一熠娶聘皆名族孺人原葬容城先塋今以衣履祔楊孺人原塋夏峯東阡今移祔

銘曰至道浩浩待人而行貞元會合大儒挺生定交江村志紹濂洛與旨微言開關啓鑰窮理盡性本於孝弟表裏

洞然天空月霽雲臥蘇門韜光斂耀安樂窩叟千載同調
峩峩夏峯萬仞其高攀援莫逮仰止爲勞松楸鬱鬱幽宮
在茲我銘不磨永式來思

江南鎮江府海防同知冉渠吳公墓誌銘

公姓吳氏諱洪字伯其別號冉渠先世山西洪洞人明初
遷睢州居大麓岡高祖將仕曾祖待價祖與點以文學名
余嘗誌其墓所謂幼兆先生者也父斯信博學工詞賦以
公仕贈文林郎廣西潯州府推官母許氏封太孺人公賦
資穎異好爲深湛雄偉之思十五習詩賦清詞麗句往往
驚其長老爲制舉義不拘尺幅落落有奇氣贈公卒家業

中落事太孺人備盡色養撫三弱弟讀書有成孝友爲人
所難補寧陵庠諸生屢試高等嗜讀書日記萬言喜怒窘
窮患難流離未嘗釋卷至盜賊縱橫匿荒蓬斷垣中先死
倏忽猶暗誦不休秦漢金石遺編海外重譯之書讀之欣
然自得若平常淺易之辭不屑意也亂後家鮮藏書聞旁
郡舊家有異書數百里徒步往求之累日夜抄寫盡誦乃
已持論俱有根據未嘗特創一說讀書旣多時出其新奇
者資談柄時人見其空曠奇肆詫爲語怪或操論闢之公
不與較也順治乙酉登鄉薦壬辰中會試不就廷對里居
六載益肆力於學天文曆法律呂音韻易占勾股算術及

湯潛菴集 卷之十 三十一
西洋奇器之學無不精詣戎戍入都問曆法於欽天監考
樂器於太常寺窮思幾廢寢食一切應酬俱廢成進士甲
次例得京職會改新制授推官得廣西潯州時粵地初定
多封疆大案公聽之爲求生路不得則坐臥不安嘗舉歐
陽崇公求其生而不得則死者與我俱無憾之言自警一
日斷事畢一囚出而泣曰公仁人也而不能活我誰復活
我者巡撫行部務嚴刻博風力公力爭之曰宦粵者皆中
土人攜妻子蹈萬里煙瘴地謀升斗祿一掛吏議遂終流
落竊願明公愛惜士人若有大奸惡某亦安敢隱哉巡撫
感公真誠嘆爲長者察潯屬果無可糾者以此益信公民

朴事簡無學士大夫遊處惟讀書以自適往來省會山行
水宿蠻烟瘴雨誦讀之聲達丙夜家園萬里宦况冷絕幽
憤無聊一寓之於詩自粵西陞同知鎮江軍府初立事務
殷繁公職海防應一切爲之綜理時方視爲利藪公悉推
讓同官故廳事寂然雅重學校賓禮寒素市書萬卷與文
士校讐討論夜則挑燈對讀遇得意高叫長歌胥吏皆驚
起至於簿書寓目而已署丹陽衝邑驛費浩繁歲額不敷
公不欲累民然亦坐是供應多疎鐫二級歸公念太孺人
春秋高諸子侄皆善屬文構書屋數楹寢處其中口講手
批至夜分以爲常與二三舊友結社賦詩出則乘柴車或

徒步仕進之念泊如也工填詞晚年聲律益細伶工奏伎
點拍失度卽笑語喧闐中輒詰其誤更深於道家言自謂
龍虎經參同契諸書塵埋千年無人識其要領一旦爲之
洗滌筋髓丹學秘訣悉傳人間海內好道之士當有知其
所以然者古詩以昭明文選爲宗近體初專師少陵後遍
究四唐含咀菁華歸詣自然論詩上下古今升降正變可
出鍾嶸上其辯議精詳筆鋒清雄識者以爲彷彿鄭夾漈
云偶爾撰述信筆行寫連篇累幅至其精神凝注稿必數
易常有一字未妥一韻未安收視反聽審諦推敲必得當
而後止人知公之博綜而不知其謹慎如是獨不喜爲應

酬之文如記序碑銘之類爲人所強偶一爲之非其好也
一日過余深談余謂以君異敏若專功學易必能發前聖
之蘊公遂盡發所藏諸家易說約與余定期會講無何而
公逝矣嗚呼惜哉公平生篤於友誼急人之難初登第時
有友被誣幾罹重典公爲之遍謁當事傾身營救事卒得
白近酒杯酒談笑不啻骨肉一旦失路反眼若不相識更
爲之下石者比比也若公者真古人哉余求友於天下往
往號宿學負盛名者叩其所得輒不及公萬一而公官不
過郡佐未嘗一登著作之庭雖其言可以藏名山信後世
矣而其志尚若有進而未已者此余之所以咨嗟悼惜長

慟而不能自止也今其子請誌墳石不一語粉飾亦所以報吾友而存其篤信之志云所著雨蕉齋詩集選詩定論唐詩定論律呂正論參同契正論陰符經正論龍虎上經指月入藥鏡圖說睢乘資睢陽人物誌雨蕉齋禱錄道言禱錄共若干卷公生於明萬曆四十三年五月三十日卒於康熙十四年二月二十五日得年六十一配沈氏封孺人子二學顯廩生宗願國子監監生沈宜人出孫元復宗願出以康熙十四年月日葬大麓岡先塋之次

銘曰羽陵宛委搜秘笈續遺補亡人莫識結繩掌故羲皇畫地負海涵驚奇特鏗鉤震曜貫冥曠揚風抗雅追三百

何不廢颺丹陛側百年禮樂會生色功名遺愛在南極灑江之水何湜湜北固山頭一片石至今父老淚沾臆鄴架縹緗存手澤有子文章壓元白奕葉繩繩傳休德舊史銘辭在幽宅

翰林院侍讀愚山施公墓誌銘

康熙二十二年閏六月十三日翰林院侍讀施公卒於京師之寓舍公知名海內者垂四十年天下之士或推其文學或高其行誼或稱其治術而余少同舉進士晚年同事史館相知尤深公病余往視之握手熟視曰平生知我之深無如子立言能信於世亦無如子因歎獻不能語既卒

墓且有日其子彥恪遵遺命來請銘其墓宮之石余何敢
辭乃垂涕序而銘之公諱閏章字尚白號愚山江南宣城
人大父鴻猷明萬曆間遊鄒忠介焦石城兩先生之門爲
東南人士所宗父譽以公貴贈奉政大夫山東按察司僉
事叔父譽余嘗誌其墓所謂砥園先生者也兄弟孝友內
外雍穆江南言家法者推施氏公少賦異資習聞家學從
沈徵君壽民遊弱冠工制舉業兼治詩賦古文辭先達多
稱之順治丙戌舉於鄉己丑登進士第授刑部主事天
子大婚禮成 詔赦天下公奉使廣西因得遍遊粵西諸
山水著粵江賦以見誌旣歸丁祖母艱服除補員外郎引

經斷獄期於明允有疑獄反覆推求常至夜分曰如是則
生者死者可兩無憾也諸卿大夫素以公嫻文辭或不習
吏事至是藉藉言公可大用矣當是時 世祖方興起文
學選尚書郎資望深者 御試高等乃得補授提學使者
公名居第一擢提調山東學政按察司僉事公旣負文名
久士子爭自磨礪冀得一當公意而公教士以通經學古
爲先論文崇雅黜浮風氣爲之一變其應 御試也大學
士安丘劉公實薦之後屬其同年孤子竟以文不入格被
黜落劉公語山東巡撫曰學臣不受請託獨施君耳公之
能舉其職與劉公之能相與有成也時人以爲兩難秩滿

遷江西布政司參議分守湖西道時軍餉嚴迫屬邑多逋賦追呼急輒相聚爲盜公作勸民急公歌召父老垂涕而諭之父老見公長者相率輸租恐後吉水有巨室依險自保邑令乘間執之以叛聞公察其僞諭令輸租而遣之因遍歷崇山廣谷間作彈子嶺大阮嘆竹源阮諸篇以告諸長吏讀者爲流涕曰施使君今之元道州也暇日修景賢白鷺洲兩書院集多士講學其中或屏車騎往來金牛石蓮諸洞宴遊賦詩者舊逸民亦樂就之昔羅旰江嘗爲寧國守以和易得民公大父實服膺其教公之爲政亦畧相彷彿而時事之難易有大不同者無何以裁併監司歸里

而叔父砥園先生年七十老矣公依依左右有終焉之志又十年 詔舉博學鴻詞之士三相國薦其才 召試授翰林院侍講纂修明史公素以文章飭吏治至是始得當著作之任亦自發舒考核同異辨析疑僞是非可否無所回互而朝士大夫習其姓名求碑版詩歌者趾錯於戶四方名士負笈問業無虛日公一一應之不少倦平日口期期若不能言及談及忠孝奇節輒抵掌奮發慷慨流涕不能自已遇羈人才士矢志無聊多方爲之延譽死喪困厄賑卹不遺餘力天下士以是益歸其門入則盡力編摩出則應酬賓客又砥園先生已卒格於例不能請假居恒忽

忽不樂而精力亦稍憊矣。天子知其學行將用爲日講
官司記注矣惜其老也而止辛酉典試中州稱得人又二
年進侍讀充太宗聖訓纂修官益恪恭不敢懈吾見其
貌加衰而不自休息私憂之無何病遂卒嗟乎以公之才
使專精史事久於其職一代君臣事迹庶有倫敘乃事未
竣而遽歿不但生平交遊之情爲可慟而國家失此良
史才爲可惜也悲夫公所著書學餘集八十卷年譜四卷
詩話雜著一卷歿後友人檢討高君詠爲編輯藏於家公
生明萬曆四十六年十一月二十一日距卒得年六十有
六於某年月日葬於宣城某地之原配梅氏繼李氏贈封

並宜人副室蔣氏徐氏子二彥淳恩貢生彥恪郡庠生孫
男女俱三婚娶皆名族

銘曰儉以處身惠以行仁志希先民夔乎絕倫養其和平
發爲菁英金石喞喞大放厥聲敬亭如蓋宛溪如帶九九
松檜勿剪勿拜維茲幽堂哲人之藏青烏告祥奕葉其昌

翰林院提督四譯館太常寺少卿王君墓誌銘

太常王君子厚以省覲南歸道病卒於臨清之舟次計至
京師士大夫咸嘆息泣下子厚在詞館後余者十五年余
再起入都相與爲忘年友嘗觀其氣槩嶽嶽不苟隨時趨
心竊儀之官諫垣十四載前後章數十上皆關國家大

計使一旦秉鈞軸盡摠其生平所蘊必大有建豎而今竟已矣雖其所表見已自章章於世而不能盡其才使朝廷收得人之效是可嘆也家嗣延禧十莖且有日乃奉其王父封公書來京師以隧石誌銘爲請予不敢辭据狀子厚諱曰溫一字綠野其先山西洪洞人也明初遷尉氏之古三亭岡遂占籍尉氏傳十餘世皆有隱德至芝童公萬曆庚子魁於鄉漢中推官遷同知青州府生子二長鳴玉次鳴球卽封公也封公中順治庚子鄉試第一甲辰中會試有子六人子厚其長也子厚少負軼才年十一補博士弟子有神童之目癸卯舉於鄉丁未會試中式時年甫二

十三初封公甲辰未與殿試至是父子同對策大廷人以爲榮封公授中書需次里居而子厚選弘文院庶吉士慨然有志於經世之學己酉授兵科給事中遇事侃侃無所阿附時有旨甄別督撫而不及提鎮疏言提鎮爲封疆大帥權無異於督撫今有歷任七八年或十餘年者果人稱職乎請一體甄別以肅軍紀是時拜官甫數日時論避之詔赦軍犯而地方官往往淹滯不遽釋上言朝廷布宥罪之恩而奉行者率至五六年之久脫其中有客死異鄉者如曠典何又言詔欵內逃人窩主干連人犯俱准赦免而直省地方距京師遠者數千里近者數百里有

汝前起解而赦後猶械繫道路者天時酷暑銀鑄烈日之下保無暈死道上者乎臣以爲與其豁之於解到之後曷若宥之於未解之前請 勅部飛檄各督撫立釋歸農使蒙赦者早慶生全幸甚皆奉 俞旨自是或密奏或公陳多見採納蓋其意感 朝廷知遇思奮發以圖報稱孜孜以清吏治重人才分別激勸綜核名實雅不欲以倖直僨事而忠愛惓惓尤有人所難者間嘗有所搏擊不避大僚側目者衆而卒安然無幾微震撼之虞者仰賴 皇上至聖大仁優容諫官故讀其奏疏不獨可以見其志亦足彰 主聖臣直之治象也一日 上召集臺垣策問進勦機

宜轉輸方畧子厚敷對稱 旨奉條奏詳明克稱言職之論蓋見知於 上者深矣數年之間經筵侍班掌印戶垣筦登聞鼓者再進鴻臚光祿寺少卿轉通政右叅議尋轉左以至提督四譯館太常寺少卿駸駸大用矣壬戌五月 上念河工關運道民生簡公廉大臣往勘會大司寇魏公以年老辭則 命偕少司寇宋公往瀕行陛見者三單騎馳往西至蕭碭北至唐宋山東至海口南至淮揚周廻長隄三千餘里尺計寸較繪圖入告蓋其勤慎如此甲子冬遇 覃恩 誥封父如其官母某氏爲恭人上將東巡遣大臣祭告嶽瀆而子厚分詣東鎮東海將事惟虔事

竣念封公家居日久便道歸省子厚性純孝晨昏定省無間封公促之入都居常忽忽不樂丙寅復請假歸初陸行至松林店而病乃買舟張家灣走天津轉劇至臨清遂不起矣生平友愛最篤遇親戚故舊咸有恩禮課子諄諄誠以守清白勿驕溢以墮家聲其他懿行如此類甚衆不暇著著其大者生於順治二年乙酉閏六月十七日卒於康熙二十五年丙寅閏四月十七日享年四十有二配蘇氏封恭人邑庠生光訓女子五延禧拔貢生延祐候選州同延祉延祺廩膳生員延祚附學生員女一康熙二十六年某年月日葬於某原

銘曰嗚呼王君邦之傑楮柱言路羞躐躡位躋奉常神人悅藏骨於斯山截嶮後億千年視斯碣

行實

封中憲大夫陝西按察司副使先考府君行實

先府君諱祖契字孝先號命式先世爲滁州來安縣人明初祖諱寬從高皇帝起兵授總旗陞昭信校尉廣東神電衛百戶子諱銘調中都留守司金川門百戶再傳至諱庠正統九年以北征功陞睢陽衛前所千戶遂家焉庠生諱英署衛事才略甚著英生諱卿平巨寇王堂築黃河堤百里備禦宣府定亂汝南所至輒建奇功陞指揮僉事世襲

驃騎將軍中都正畱守於先君爲高祖是生岷州守備公
諱易居官焯有聲烈岷州公三子長諱希韓肅州叅將仲
諱希范以選貢任山西趙城縣丞趙城公生我先大父諱
敏爲庠員性寬厚口不言人過嘗之荆楚適其地大祿捐
貲施粥全活數千人而內外親黨賴以舉火者固甚衆也
初娶徐孺人繼談孺人兩劉孺人最後繼許孺人生府君
兄弟四人府君其三也府君自幼穎異習毛詩精通大義
傳註之外時時有所論說咸出人意表先大父撫之喜曰
大吾宗者此子也弱冠爲人峭健有奇氣應試爲督學昭
度潘公鑒拔補開封學諸生時先大父年七十餘嘗卧病

府君不脫衣冠侍湯藥傾貲延醫顛天請代不交睫者四
十餘日及先大父捐館舍哀毀骨立附身附棺靡不誠信
鄉黨翕然稱之窀穸甫竟內難外侮一時並至有豪紳挾
勢橫噬州中城居之第宅負郭之田園一旦盡爲奪去府
君曰此先人之業不可不直其冤走愬上臺侃侃不屈興
化吳相國巡按河南與渠同年友也意不能無偏重府君
平立睨之曰明公奉天子命代符中原寧爲同年來也吳
公奇其言降階謝之司李萬公元吉聞之亟稱曰國士國
士勸府君曰彼勢方張當潛身避害勿蹈危機彼勢可立
待也自是厚自韜藏凡出必卜而後行然家業蕭條內外

拮据遂不得專事舉子業矣念家世爲閥閱舊族恐貽弓冶羞爲不孝斌延師督課手抄左國公毅史漢八家文數百篇及易通正蒙詩書分其句讀正其韻解授不孝斌午夜燈火熒熒不熟不休曾憶雨中一日寫漢文二十篇腕爲之痛時不孝斌方十一歲此二十篇者每讀之未嘗不流涕也同郡有獲嘉王先生者學行爲士林宗府君延之家塾大集里中子弟講孝經小學府君執禮甚謹不孝斌亦循循不敢自外法度王先生曰湯氏世有令德今命式好賢重禮其終必顯時府君卽貧困而施濟未嘗少倦冬月雪甚有楊生者過門衣冠腐敝府君解衣裘贈之楊生

故鄴下人也負傲骨不輕受人贈遺獨數數受府君餽語人曰湯公君子也故受之先大母年高重聽府君日供甘旨會寇氛洊熾饑饉頻仍早夜經營備盡色養事兄貴皇公甚恭謹貴皇公工文詞治生雅非所長府君日爲具饌使得專志下帷不爲室家累心姊遭危病迎於家親製藥餌調理之復故始歸內行之謹蓋人無間言云至壬午寇陷睢城家園遂爲戰場府君冒險躬輿大母過河朔往來曹衛大名之間顛沛流離所以怡顏順志者仍左右無方也當是時先母趙恭人已殉寇難先伯父遊學於浙先叔父卒於歸德遺孤呱呱撫恤備至大母棄世號泣擗踊勉

襄含殮捨攘之際奉柩與先大父合祔繼有先伯母喪竭
力殯葬亂離中真嘔盡心血矣先伯父在浙依衢州司訓
孔公病故遺女十歲無所歸府君憊歷險阻携回擇婿資
奩如禮時值鼎革往返六千餘里波濤之洶湧盜賊之出
沒身幾危者數矣不孝斌實從行至今憶嚴陵灘彭蠡湖
猶心悸也先叔子流落曹南府君百方贖回爲之延師娶
婦後又授以田二百畝嘗語不孝斌曰同胞兄弟所存骨
肉惟此府君每一言蓋未嘗不淚涔涔下也丙戌以後河
南兵戈甫定田廬荒蕪已久府君手闢蒿萊定此室宇猶
篝燈市書以課不孝斌誦讀爲事曰我備嘗艱辛不以爲

恨振先人之緒惟汝是望耳不孝斌夙夜識之不敢怠戾
子幸叨鄉薦己丑捷南宮壬辰 廷對讀書中秘府君手
書諭曰館職清暇正當肆力古學爲經世大業勿得優遊
曠廢有負遴選至意翰苑天下名賢所聚學問必有什倍
汝者虛心領略庶有進益仕路嶮巖從來可畏惟敬以修
身儉以養德名位素定不必預計古來賢豪只因脚根不
定隨風逐波失其生平甚可惜也其他貽書訓戒之辭皆
類此甲午不孝斌授國史院檢討乙未選 諭陳言狂直
幾得罪府君豪無愠色後 召見南苑 天語溫然且問
汝父年幾何今在京否斌據實以對知 聖度如天遠

使馳報府君北向叩首仍寄書勉斌恪共職業語最切至
丙申蒙 世祖親簡加一級備兵潼關迎府君至署府君
曰我來非就養也觀汝之爲政耳今地方凋敝極矣寬一
分則民受一分之賜况 君恩深重 綸音優渥若不夙
夜砥礪使吏畏民懷非但有玷官方抑且抱愧清夜楊伯
起爲此地先哲汝當敬體四知之訓我不能久居此不孝
斌謹受命府君至潼逾月卽歸不孝斌送至境上俯伏道
左府君反覆叮嚀至今歷歷如昨日事真令人一追憶一
嘔血也丁酉恭遇 覃恩封府君爲中憲大夫陝西按察
司副使府君雖被榮恩而自奉儉約數椽僅蔽風雨出入

常徒步地方有大役輒身任之睢城自闖寇折毀繼遭河
陷時州衛分壤郡守屢議修築而衛中有欲簽報大戶借
名科歛者府君建議按畝出夫爲力役之征衆擎易舉衛
帥忿然見於詞色後衆論僉同卒如府君之議城甫畢而
鄰封盜起遠近洶洶官府下令督民防守府君曰市民日
營升合賊未至而使之先困非計之得也偕紳士晝夜宿
城頭居民賴以安堵吾州額協宜溝驛站銀而錢塘則協
吾州錢塘以隔省歷年不應而宜溝驛奉上臺嚴檄提催
驛寢不支府君言於憲使楊公免協濟驛困以甦他如減
柳梢之數清里甲之累皆不避勞怨一力擔承蓋府君盡

心桑梓周且悉如此又嘗修文廟刊郡乘請釋滯獄禦水
賑荒諸善事尤爲彰彰高祖塋墓年久不無荆榛樵牧之
感府君與族人約歲時伏臘拜掃必親品物豐潔祭畢爲
讌仍獎其孝弟勤儉者而責其不奉家訓者必垂涕謝過
乃已時族中惟叔祖勉齋公最長府君拜跪侍立禮節惟
謹家有旨蓄必先進叔祖叔祖亦怡怡然至府君第或竟
月忘歸也平居嘗語諸弟子曰吾家無甚疎族自曾祖以
上則一父之子也高祖以上則一人之身也一人之身而
至若塗人此蘇明允之所以嘆息也周急困乏或粟米或
布帛歲以爲常蓋府君敦本重族原於至性故也平生英

偉儼洞晰世務遇大事衆人錯愕不敢發一語者府君
片言立決卽之溫溫然初不見有峻厲之色與鄉中父老
時相過從飲酒談說稼穡較歲豐儉間命巾車遊東郊之
園圃蒔花種竹怡然自樂人以爲有香山洛社之風焉郡
守戴公行鄉飲酒禮採輿論聘府君爲大賓府君固辭不
獲凡三與賓席園橋觀者如堵咸嘖嘖贊嘆以爲府君克
光大典云巳亥不孝斌量移嶺北便道歸省府君時患便
血之症神氣減於往時不孝斌奉侍數日憑限迫切府君
勉令就道銜淚拜別自此府君雖勉爲笑語念斌遠宦實
多憂慮又值中子之變哀痛過節其病日深斌在虔聞之

亦感危症堅志請告幸蒙 題允府君聞斌歸喜見顏色
病漸愈曰我不幸蚤經家難繼遭寇變盛衰感懷骨血傷
心五十年中言之令人欷歔今幸叨恩盛時汝以壯年勇
退我體氣稍健父子聚首閱耕東臯課讀南軒亦老年佳
事也嘗錄馬援柳玆戒子書揭之庭壁斑甫七歲學庸論
語皆口授病手猶手抄古文數十篇教之不孝斌請代曰
我固樂此不爲勞也不孝輩日侍膝下以爲可以承權百
年孰意昊天不弔至癸卯七月痰病陡作延醫百方調理
痰嗽稍定不孝輩私心禱籲以爲庶幾痊可而氣息漸弱
卒至見背嗚呼痛哉彌留之際猶以斌硜執不能合時斑

年幼未能成立爲慮我父眷念不孝身有盡而心無窮言
念及此能不令人心肝屠割哉嗚呼痛哉天乎何不殞滅
斌等而奪我父之速耶嗚呼痛哉府君生於萬曆三十二
年甲辰十月初七日卯時卒於康熙三年甲辰四月初五
日辰時享年六十有一配我前母劉氏廩員公諱升女德
性溫淑生於萬曆三十三年乙巳五月初三日卒於天啟
二年壬戌六月初四日享年一十有八繼配我先母趙氏
誥贈恭人廩員公諱尙敬女孝慈恭儉明於大義寇變殉
節巡按御史李公粹然題請奉 旨旌表建坊立祠春秋
祭祀事具祭酒吳公偉業修撰鄒公忠倚傳中生於萬曆

三十四年丙午十一月二十六日殉節於崇禎十五年壬午三月二十二日享年三十有七再繼我今母軒氏儒士公諱光里女子二長卽斌江西分守嶺北道布政使司右叅政娶馬氏封恭人庠員公中駿女趙恭人出班聘廩員袁公鴻烈女軒孺人出女三長趙恭人出次三軒孺人出孫男三溥濬沆孫女二俱斌出今擇康熙四年乙巳十一月初二日申時奉葬於城北十五里澗岡東南之新阡苦塊餘息語無倫叙惟大君子哀而賜之琬琰先府君歿且不朽卽不孝兄弟藉以少解終天之恨亦且不朽

祭文

祭孫徵君先生文

嗚呼道之在天下也如元氣之在人身彌綸磅礴上蟠而下際者小不遺乎日用而大卽麗乎彝倫斯誠須臾不可離矣而何真見而體備之者難其人卓哉先生維德之純博極造約窮理識真以孝弟爲盡性之基由忠恕爲達化之門當蚤年辨志定交江村析義利於秋毫等富貴於浮雲固已抗志聖賢之途溯洄洙泗之津及璫餒肆虐禍逮清流不避虎獲力爲營救雖運數難回而天地正氣有所楛柱而長存推其本志固已視死生如旦暮而恬然無恙者以是知天之未喪夫斯文德盛道尊徵書歲頻衡門之

間安車蒲輪而先生堅卧不起天下想望高風如泰山喬嶽之嶙峋才本王佐而不用學爲帝師而無民天欲存斯人之命脉故畱碩果以至今晚年結廬百泉嘯臺行窩雲物一新兼山堂上彈琴鼓瑟曾無間乎晨昏四方學士負笈捭衣公卿牧守擁篲乞言而先生悉開導啟誨之懇懇家庭肅雍孝慈睦婣薰蒸涵育而聞風興起者莫不油然而相親卽頑梗之夫澆薄之俗皆一變而敦厚醇龐又孰非先生之過化而存神道隆益謙業廣彌勤朝乾夕惕自強日新通達物我而不滯酬酢萬變而不紛融朱陸之同異與濂洛而不鄰隱顯無間體用渾淪想像其所至庶幾

乎乾坤同其消息造化合其屈伸凍解冰釋而湛然不動者如天空月皎無纖微之埃塵此固與道爲體矣何尋常功業文章之足云某從遊十載提撕惟懃日出而譚至于夜分青燈白雪誨言諄諄方恃爲斗杓之可依豈期天不憇遺而兩楹之兆遽聞嗚呼年屆期頤名垂後禩生順歿寧亦可無憾于蒼旻矣而獨是微言旣絕聖道荆榛異端日起雜學紛紜功利詞章之說惑於前而虛無寂滅之教誘於後更誰爲挽世風於旣靡疏長河於將堙今者窀穸在卽雞酒式陳音容依依而如在旨緒茫茫而莫尋傷儀型之永隔悲卒業之無因尙冀先生翼我冥冥之中俾勿

湯潛菴集 卷之十
墮迷途勉策駑駘之力而上臻

祭同年施愚山文

嗚呼當世之有先生也吾道之標準也而今竟溘然長逝耶哲人云亡後學其何宗乎先生之鄉爲盱江敷教之地而大父中明公倡教東南與漪園南臯爲師友先生賦資中正漸濡庭訓孝友純懿仁慈篤摯見利斯避慕義若競常以博愛弘濟爲心會友輔仁爲樂閭閻諤諤不亢不隨推挽名流吹噓後進是皆出自真誠非由矯僞至於恤困苦如拯溺救焚夙夜遑遑猶恐不及世之學者高譚性命樹立壇坫求其惻怛爲懷渾忘物我如先生者幾人乎又

宣城文章風雅代有傳人梅都官尤兩宋詞人之冠先生爲文不尙鉛華醇深瀟灑而精力所注於詩尤深都官詩歌見稱廬陵以今準昔不啻過之世之文人學無原本如青儷白補綴爲工遂足取譽一時自矜博雅求其典型不墜追配前哲如先生者幾人乎晚歲出入承明秉筆史局老成宿素典故熟聞考據精詳褒彈不苟倘藉以告成卽不敢遽言班馬亦庶幾希蹤歐宋而汗青無期哲人獨謝此又不能不爲之痛惜也某與先生定交三十餘年良友砥礪之情知己存亡之感言之不能盡而獨舉其大者以見先生所關於世非偶然也嗚呼先生其以予言爲然乎

漢書

卷之

三

上言堂

否耶

